

家範典第一百十一卷

中表部彙考

爾雅 釋親

姑之子爲甥舅之子爲甥

注 體敵故更相爲甥甥猶生也今人相呼蓋依此

從母之男子爲從母昆弟其女子子爲從母姊妹

中表部總論

儀禮 喪服

從母昆弟傳曰何以總也以名服也

疏 釋曰傳問者怪外親輕而有服者答云以名服者用從母

有母名而服其子故云以名服也必知不因兄弟名以其昆弟非尊親之號是以上小功章云爲

從母小功云以名加也爲外祖父母以尊加也知此以名者亦因從母之名而服其子爲義

姑之子

注 外兄弟也

傳曰何以總報之也

疏 釋曰云外兄弟者姑是內人以出外而生故也外兄弟傳發問者亦疑外

親而服之故問也答云報之者姑之子既爲舅之子服舅之子復爲姑之子兩相爲服故云報之也

舅之子

注內兄弟也

傳曰何以繼從服也

疏

釋曰云內兄弟者對姑之子云舅子本在內不出故得內名也傳發問者亦以外親服之故問也答云從服者亦是從於母而服之不言報者爲舅既言從服其子相施亦

不得言報也

中表部藝文一

送表弟呂讓將仕進序

唐柳宗元

吾觀古豪賢士能知生人艱飢寒蒙難抵暴抑無告以呼而憐者皆飽窮厄恒孤危詭艸忡忡東西南北無所歸然後至于此也今有呂氏子名讓生而食肉厭粱稻欺紈穀幼專靖不好遊不踐郊牧坰禁不目小民農夫耕築之倦苦不耳呼怨而獨粹然憐天下之窮甿坐而言未嘗不至焉此孰告之而孰示之邪積於中得於誠往而復咸在其內者也彼告而後知示而後哀由外以鑠已因

物以激志者也中之積誠之得其爲賢也莫尚焉呂氏子得賢人之上資增以嗜儒書多文辭上下今古左程右準以爲直道其於達且大若稼而穀圃而蔬不丐買而有也今來言曰道不可特出功不可徒成必由仕以登假辭以通然後及乎物也吾將通其辭干於仕庶施吾道願一決其可不可於子何如余曰志存焉學不至焉不可也學存焉辭不至焉不可也辭存焉時不至焉不可也今以子之志且學而文之又當主上興太平賢士大夫爲宰相卿士吾子以其道從容以行由於下達於上旁施其事業若健者之升梯舉足愈多身愈高人愈仰之耳道不誤矣勤而不忘斯可也怠而忘斯不可也捨是吾無以爲決子其行焉

與表弟盧復書

李華

八月八日外兄李華敬簡盧十五弟則之處秋風漸高路出泗上將詣職役如所料乎往返勞止當與時俱暢也華疹疾無聊賢姊與諸君尋常耳福卿漸減弟勿憂之與弟別來十餘年比聞在代朔之地明時道舉出身乃能上爲寡姊下爲孤甥求爲雁門主簿束身戎馬之間始終無過之地此一難也時方艱危動隔生死骨肉妻子寄在河朔一身萬里省姊淮南此二難也喪亂以來時多苟且

松貞玉粹亦鬱頽流唯弟卓然介立寒俗又詞學問守正不移金石之聲冷然在聽此三難也五性之中盧爲峻茂根原上古歷世著明降及聖唐仁賢不絕外家陵替稍久弟其勉之盧氏有謐翁祭法又世以書聞華恨未見弟爲廣訪求也南祖分於何祖帝師今有四房誰各承後弟爲華具條流相報也頃撰軍器舅神道碑後其房族由來意欲如軍器之志廣外家之美令萬代聞見不復討譜牒也華質性鈍弱而慕汲黯卜式之直晚歲思夫子互鄉之見林宗賈淑之後若悟此道仁在其中易乾元之說曰含弘光大品物咸亨大雅曰既明且哲德合天德老氏所弘夫子卽述旣自以爲戒亦規弟持正也弟正直太過不能容納時人是以相箴努力無忽近有鄭五書信否四姊處得消息無忽忽不次華敬簡

祭楊判官八弟文

唐次

維年月日姨兄開州刺史唐某以清酌庶羞之奠敬祭于楊判官八弟之靈平生懿密重以嘉姻四海之內惟君一人發自總角逮于知命遨遊讌寢一歌一詠周流俯仰得君輝映野寺孤亭松門竹徑接襟握手和神善性霜鶴唳天玉音在聽空室閒齋拈碁爛柯自非偉生受勝相磨坐隱終日負

進亦多歷歷笑言其情若何歡事勝遊皆隨逝波事均榮感心冥貴賤骨肉爲交肝膽相見嗚呼哀哉婉予幼妹爰居爾室既結其裯載和琴瑟何年齡之脆促乃貞美之先失悼手足之零落又吾人之凋歿以君之才以君之藝合踏豐福合居上第行與命違道將時背遏此仁厚天胡不惠博雅裴君鎮此南土大昭儒髦鶴鴻作倡曾未累月中茲炎毒百藥無驗頽齡愈促悵悵旅魂淵淵鰥目目雖瞑而有恨魂強招而可復加有傷怛況惟我親涕淚橫隨遍乎衣巾想容色兮如在覽毫翰兮猶新嗚呼哀哉神理昭然幽途可覲悲心自攢痛淚血瀝何疇日之歡愜變今辰之空闊歸葬猶緩俟君冢嫡魂兮歸來安此幽宅嗚呼哀哉尚饗

惠州與程正輔

宋蘇軾

某再啟竄逐海上渴況可知聞老兄來頗有佳思昔人以三十年爲一世今吾老兄弟不相從四十二年矣念此令人悽斷不知兄果能爲弟一來否然亦有少拜聞某獲譴至重自到此旬日外便杜門自屏雖本郡守亦不往拜其辱更以近臣得罪省躬念咎不得不爾老兄到此恐亦不敢出迎若以骨肉之愛不責末禮而屈臨之餘生之幸非所敢望也其餘區區殆非紙墨所能盡惟千萬照悉

而已

某啟兩甥相聚多日備見孝義之誠未暇別書悉之兒子適令幹少事未及拜狀輒已和得白水山詩錄呈爲笑并亂做得香積數句同附上前本并納上

某慰疏言不意變故表嫂壽安縣君遽捐館舍聞訃悲怛感涕並懷切惟恩義深篤追悼割裂哀痛難堪日月流速奄畢七供感勤逾遠奈何某限以謫居莫緣奔詣弔問愧恨千萬幸冀省節悲悼强食自重不勝區區謹奉疏慰不次謹疏

祭汪尚書文

朱熹

維淳熙三年歲次丙申三月朔二十七日壬申從表姪宣教郎主管台州崇道觀朱熹謹以香茶清酌致祭于近故端明殿學士尚書汪公之靈曰嗚呼惟公學貫九流而不自以爲足材高一世而不自以爲名道尊德備而不自以爲得位高聲重而不自以爲榮蓋玩心乎文武之未墜抗志乎先民之所程巍乎其若嵩岱之雄峙浩乎其若滄海之涵渟自秀發于妙齡冠倫類而獨立中委棄于諸侯實天脫其羈縛迨壯歲之來歸曰良時之儻吾及曾墨突之未黔復吾行之汲汲汨東閩而西蜀

亘萬里而周流騰茂實而愈偉膺神聖之訪求旣銓綜于天官又潤色乎皇猷謂朝夕之疇咨卽進陪于廟謀何儇媚之狡夫獻功利之浮說公抗疏而指陳請昭姦而聖絕事乃謬而不然吾何爲乎茲列寔隱屏而就閒弭長駕之遐轍粵退司于閒館遂適反乎丘林託僧廬以靜處或獨往而孤尋眷塵編而寄懷若與世乎無心衆嘆公何其樂之獨而孰知公爲有憂之深伊有識之望公釋東山而再起以卒究其所施俾斯民之咸喜胡彼蒼之不可信曾不一老之愁遺忽堂堂而逝去興殄瘁之悲詩熹也孤生叨塵末契辱教誨之殊常殆相期于國士雖不見者十年亦音書之相繼不鄙謂其庸虛每諮詢而弗置茲述聞于訃告悵失聲而永號巾素車以卽路越閩嶺之崇高行踽踽而涼涼孰有如予心之鬱陶跼陳詞而侑奠痛人師之難遭

祭劉共父樞密文

前人

維淳熙五年歲次戊戌九月辛酉朔二十日庚辰從表弟宣教郎主管建寧府武夷山冲佑觀朱熹敢以清酌庶羞之奠告于近故建康留守觀文殿學士彭城劉公之靈嗚呼哀哉天胡付公以瓊奇俊偉之材而不并假以耆耋期耄之壽胡位公以樞機藩屏之重而不遂畀以彌綸輔贊之權使公

名若極富貴而無欲實則抱憂歎以終天此中外志義之士所以聞公之薨皆失聲而相弔或雖未識公面而亦不自知其涕泗之流漣者也嗚呼哀哉惟公生有異質早擢巍科退而自保弗競弗譁屈首受書典學于家內充其美外振厥華暨登王朝遂掌綸綺獻納綢繆訏謨密勿忤權觸要無所回屈帝眷弗渝試以郡級受鉞于南剿頑踣凶婉變赤子撫摩哀恫禮賢勸學導和致豐報政三年鄒魯其風帝曰來歸秉我兵柄曾不幾時咨以大政公奮其庸帝虛以聽張礮宏綱塞絕僭令道直身危突不暇黔出臨兩鎮威燁恩漸適嬉于堂遽哭于苦恩詔起之有竦其瞻公臥弗承帝悉其孝曰究汝哀來觀來教公言益切公守不撓再撫于潭亦顯其效乃遷建業民病以饑公不寢食起坐嗟咨方略旣張惠術四施曾是流孳化爲充肥帝嘉乃勳加勞進律倚毗方深遠告以疾忠無隱情諫有遺筆帝驚罷朝悼此良彌嗚呼哀哉我以孤童來託公家公不鄙我勸導有加公姿鸞鵠我性磨厲豈無異同卒莫疵瑕自公進爲論議慷慨實始斯公高明光大公之知我亦晚而最迨其永歸手札告戒褒德撫孤古昔所難并以誣我我其敢安把書長號涕隕闌干還坐以思慨其永歎念昔帝師爲國死義亞傳承之夷險一致屏山雖隱亦豈忘世公襄其傳克廣無替衆咸謂公當訖外庸

入贊皇極下釐庶工登賢屏姦復境攘戎內繼祖考畢其餘忠天胡難諱而止于此羣邪交慶家正心死矧予之衰竊究終始願言思公曷其有已嗚呼哀哉昔誦離騷舉公觴兮今拜以哭酌公堂兮私情公義兩怛傷兮神靈不昧尙克鑒予之衷腸兮嗚呼哀哉尙饗

又祭劉共父樞密文

前人

年月日具位朱熹謹遣男埜門人林允中略具酒肴之奠敬奉熹所撰次先正少傅公神道碑銘章
藁告于近故留守觀文樞密彭城劉公靈几之前曰在昔歲秋公病欲絕自力爲書來告永訣上言
國家讎恥未雪冢骨易枯此恨難滅次念遺阡豐碑未揭謂我銘之以永前烈下及諸孤羈貫在列
謂我教之它靡顧謁宇畫方嚴詞氣凜冽是豈死人而有斯說三復悲號心膂貫徹公是日三簡
并折拜疏千言忠憤是洩我雖不武實仰奇節生旣人英死當鬼傑又惟公家忠孝閥閱紀德旌功
盍付時哲公命不亂曷取凡劣諒以孤生幼罹禍孽蒙被前恩欲報罔竭故略其愚以累斯碣方將
涉筆叙次鋪列屬其來西曠日引月迄今乃成事偉詞拙遠薦陳之如聽予決想像兩公感涕摧咽
顧念滯留塵土羸繼莫相嗣人講貫廟切以此負公一飲再噎頃爲迎師寄此筆舌比聞授受稍契

磁鐵尙其不厭習久而悅盡掃童心罔蹈非轍彼孺悉藉提挈卒大公門緩此憂懼山瓢往醉野轂并設老淚如傾遠寄清血嗚呼哀哉尙享

祭劉子禮文

前人

從表具位朱熹謹以清酌時羞奠于近故劉君子禮六十七兄之靈曰自我少日託昏高門得從兄遊于今五十年矣每竊見兄志氣堅強色莊言厲論議英發滾滾不窮而臨事應變從容裁處不動聲氣目無全牛未嘗不歎其英邁閑達老大多材真有聘君先生之遺風意其必當出應時須以世前烈豈謂中歲事多不諧一日慨然謝去場屋少肆餘力誅草淮鄉數年之間亦有成績而兄好義周急不間戚疏肥馬輕裘視猶涕唾遂散其積翩然南歸憩止玉山愛其山川之秀風俗之美遊從之盛則遂求田問舍而定居焉曾未幾時遽以病臥易簷之日神宇泰然徧告親朋千萬永訣不鄙謂我幅紙丁寧筆勢低昂亡異平日赴車來止我病亦衰把書長號不能自己嗚呼痛哉以兄之才終以不遇而止于此豈非天乎昏憊支離未能亟往拊棺大慟以罄一哀又聞佳城亦既得卜祖奠之日近不踰旬走使緘詞遠寄一酌忽焉清爽如在目前嗚呼哀哉伏惟尙饗

祭程允夫文

前人

維慶元二年十一月乙巳晦外兄具位謹以香茶酒果奠于內弟吉州錄事程允夫之靈此月之初得吾弟九月六日書于中首言濫得美名恐爲師門之辱次言老不解事愧遺老兄之憂予蓋深有味乎其言如接笑談之適也旣又視其字畫謹好詞氣安閑且言受代有日骨肉俱安則又深以爲喜蓋初不聞其疾痛也及二十有九日曾君無疑使以書來乃言吾弟比以此月八日不幸死矣嗚呼哀哉以吾允夫之才之志而止于此且以何疾而遽然耶余生多艱今復老病中外兄弟蓋亡幾人有如允夫尤號同志而學與時背仕皆不逢猶冀莫年卒其舊業更相勉厲以畢餘生何意允夫而遽止此緘詞往酌悲不能文君其有知尙識此意嗚呼哀哉

中表部藝文二

詩詞

別詩

晉潘岳

岳集曰堪爲成都王軍司馬岳送至北邙別作詩世說曰阮千里姨兄弟潘安仁中外安仁詩所謂子親伊姑我父唯舅是許允壻

微微髮膚受之父母峨峨王侯中外之首子親伊姑我父唯舅

贈何劭王濟并序

傅咸

朗陵公何敬祖咸之從內兄國子祭酒王武子咸從姑之外孫也竝以明德見重于世咸親之重之情猶同生義則師友何公既登侍中武子俄而亦作二賢相得甚歡咸亦慶之然自恨闇劣雖願其繢繩而從之未由歷試無效且有家艱心存目替賦詩申懷以貽之云爾

日月光太清列宿曜紫微赫赫大晉朝明明闢皇闡吾兄旣鳳翔王子亦龍飛雙鸞遊蘭渚二離揚清暉攜手升玉階並坐侍丹帷金璫綴惠文煌煌發令姿斯榮非攸庶繢繩情所希豈不企高蹤麟趾邈難追臨川靡芳餌何爲守空抵棄葉待風飄逝將與君違違君能無戀戶素當言歸歸身蓬草廬樂道以忘飢進則無云補退則恤其私但願隆弘美王度日清夷

奉答內兄希叔五首

南齊陸厥

嘉惠承帝子躡履奉王孫屬叨金馬署又點銅龍門出入平津邸一見孟嘗尊歸來翳桑柘朝夕異涼溫殂落固云是寂蔑終如斯杜門清三徑坐檻臨曲池鳧鵠嘯儔侶荷芰始參差雖無田田葉

及爾汎連漪 春華與秋實庶子及家臣王門所以貴自古多俊民離宮收杞梓華屋富徐陳平明
上林苑日入伊水濱 書記旣翩翩賦歌能妙絕相如恧溫麗子雲慙筆札駿足思長阪柴車畏危
轍愧茲山陽謙空此河陽別 平原十日飲中散千里遊渤海方淫滯宣城誰獻酬屏居南山下臨
此歲方秋惜哉時不與日暮無輕舟

傷內弟劉常侍

梁江淹

金璧自蕙質蘭杜信嘉名丹綵旣騰迹華夢故揚聲伊余方罷秀歎息向君榮誰疑春光晏何遽秋
露輕遠心惜近路促景怨長情風至衣袖冷况復蟪蛄鳴白露汎漢沼明月空漢生長悲離短意惻
切吟空庭注欷東郊外流涕北山坰

送重表姪王琳評事使南海

唐杜甫

我之曾祖姑爾之高祖母爾祖未顯時歸爲尙書婦隋朝大業末房杜俱交友長者來在門荒年自
餬口家貧無供給客位但箕箒俄頃羞頗珍寂寥人散後入怪鬢髮空吁嗟爲之久自陳剪髻鬟鬻
市充杯酒上云天下亂宜與英俊厚向竊窺數公經綸亦俱有次問最少年虬髯十八九子等成大

名皆因此人手下云風雲合龍虎一吟吼願展丈夫雄得辭兒女醜秦王時在坐真氣驚戶牖及乎
貞觀初尚書踐台斗夫人常肩輿上殿稱萬壽六宮師柔順法則化妃后至尊均嫂叔盛事垂不朽
鳳雛無凡毛五色非爾曹往者胡作逆乾坤沸噭噭吾客左馮翊爾家同遁逃爭奪至徒步塊獨委
蓬蒿迢迢熱爾腸十里却呼號自下所騎馬右持腰間刀左牽紫遊韁飛走使我高苟活到今日寸
心銘佩牢亂離又聚散宿昔恨滔滔水花笑白首春草隨青袍廷評近要津節制收英髦北驅漢陽
傳南泛上瀧舠家聲肯墜地利器當秋毫番禺親賢領籌運神功操大夫出盧宋寶貝休脂膏洞主
降接武海胡舶千艘我欲就丹砂跋涉覺身勞安能陷糞土有志乘鯨鼈或驂鸞騰天聊作鶴鳴臯
戲寄崔評事表姪蘇五表弟韋大少府諸姪

前人

隱豹深愁雨潛龍故起雲泥多仍徑曲心醉阻賢羣忍待江山麗還披鮑謝文高樓憶疎豁秋興坐

氤氳

王十五司馬弟出郭相訪兼遺營草堂贊

客裏何遷次江邊正寂寥肯來尋一老愁破是今朝愛我營茅棟攜錢過野橋他鄉惟表弟還往莫

前人

辭遙

贈比部蕭郎中十兄

前人

自注云甫從姑之子

有美生人傑由來積德門漢朝丞相系梁日帝王孫蘊藉爲郎久魁梧秉哲尊詞華傾後輩風雅藹孤騫宅相榮姻戚兒童惠討論見知真自幼謀拙愧諸昆浩蕩雲天闊沈埋日月奔致君時已晚懷古意空存中散山陽鍛愚公野谷村窯紓長者轍歸老任乾坤

送姨子弟往南郊

劉長卿

一展慰久闊寸心仍未伸別時兩童稚及此俱成人那堪適會面遽已悲分手客路向楚雲河橋對衰柳送君匹馬別河橋汝南山郭寒蕭條今我單車復西上郎去灞陵轉惆悵何處共傷離別心明月亭亭兩相望

雨中登沛縣樓贈表兄郭少府

前人

楚澤秋更遠雲雷有時作晚陂帶殘雨白水昏漠漠佇立收烟氣洗然靜寥廓卷簾高樓上萬里看

日落爲客頻改絃辭家尙如昨故山今不見此鳥那可託小邑務常聞吾兄宦何薄高標青雲器獨立滄江鶴惠愛原上情慙慙丘中諾何當遂貞願歸臥青山郭

送姨弟裴均尉諸暨

盧綸

相悲得成長同是外家恩舊業廢三畝弱年承一門城開山日早吏散渚禽喧東閣謬容止予心君
冀言

送內弟韋宗仁歸信州覲省

前人

常嗟外族弟兄稀轉覺心孤是送歸醉掩壺觴人有淚夢驚波浪日無輝烹魚綠岸煙浮草摘橘青
溪露濕衣闌說江樓長卷幔幾回風起望胡威

至德中贈內兄劉贊

前人

時難訪親戚相見喜還悲好學年空在從戎事已遲聽琴泉落處步履雪深時惆悵多邊信青山共
有期

喜外弟盧綸見宿

司空曙